

KEJOHANAN PENCAK SILAT SEA KE-5

‘Ujian’ terakhir bagi pesilat dan pentadbir silat nasional



UJIAN TERAKHIR: Pesilat nasional seperti kapten Muhammad Shakir Juanda (*berdiri*) dan Nur Alfian Juma'en dijangka beraksi dalam pertandingan terakhir ini sebelum Sukan SEA ke-28 bermula. – Foto fail

SEMENTARA pesilat nasional bakal menggunakan Kejohanan Pencak Silat Asia Tenggara (SEA) kelima yang berlangsung hari ini dan esok sebagai peluang terakhir menguji keupayaan, para pegawai dan pentadbir pula akan memerhati cara pertandingan itu dijalankan bagi mempersiapkan diri menjelang Sukan SEA Jun nanti.

Menurut pengerusi jawatankuasa penganjur kejohanan, Sheik Alau'ddin Yacoob Marican, acara itu boleh menjadi sumber pengalaman dan ukur tara kelicinan menganjurkan pertandingan silat Sukan SEA ke-28 yang berlangsung dari 5-16 Jun ini.

“Kejohanan ini peluang terbaik bagi atlet nasional menguji keupayaan mereka, terutama apabila berdepan dengan pesilat lain di rantau ini. Besar kemungkinan mereka akan turut mengambil bahagian di Sukan SEA nanti.

“Selain itu, ia juga peluang baik bagi pemegang taruhan lain menyaksikan bagaimana sesebuah pertandingan silat dikendalikan.

Adalah difahami, selain jawatankuasa penganjur Sukan SEA (Singsoc) serta Jabatan Sains Sukan dari Sport Singapore (SportSG), pengadil dan juri setempat juga akan ‘turun padang’ bagi menyaksikan kejohanan ini.

“Saya harap mereka dapat lebih memahami cara pertandingan silat dikendalikan, supaya proses menganjurkannya menjadi lebih licin dan sempurna di Sukan SEA nanti,” kata Sheik Alau'ddin, yang juga Ketua Pegawai Eksekutif (CEO) Persekutuan Silat Singapura (Persisi).

Kejohanan ini adalah pertandingan pencak silat perta-

ma diadakan di Singapura sejak masyarakat silat setempat digegarkan berita sedih tentang kematian pesilat nasional muda bulan lalu.

Muhammad Nurshahrin Shahrudin, 21 tahun, meninggal dunia dalam tidurnya pada 14 Mac.

Sementara itu, Persisi telah memilih 13 pesilat yang bakal bertanding dalam 13 acara – 10 acara tanding dan tiga acara seni – di Sukan SEA nanti.

Pertandingan silat Sukan SEA dijadual berlangsung dari 10-14 Jun di Singapore Expo. Harga tiket bermula dari \$2.50 (selepas diskaun). – **NORMAN SAWI**